

Gairm

cheart-am, 's gun e ach 'na aon eabar 's na aona pholl air fad. Chum sinn romhainn gun d' ràinig sinn taigh Iain 'ic Néill 'ic Caluim am Baghasdal, is ghabhadh romhainn gu math ann. Cha robh duin' aig taigh ach bean-taighe 's i tachras.

Thiot an nighean bhàn aige, Sìne, a stigh mionaide no dhà. Cò nochd a staigh 'gam choimhead ach Iain MacIain 'ic Ruairidh, 's cha robh a dad a dh' ùine a staigh nuair a thòisich e air seanchas—air blàir, air mar a bha na daoine 'gan toirt air falbh dha'n arm—air Domhnall Gorm (Mac 'ic Ailein)—'s air ciad rud. Cha robh mi gearain dad ach nach robh a dh' ùine agam na leigeadh leam suidhe greis 'ga éisdeachd. Nochd an tòrradh a nuas o thaigh Eachainn 'ic Aonghuis Bhàin. Ghabh sinne 'na choinneamh aig Crois Bhaghasdal. Tha e air a ràdh gu robh aon 400 duine air an tòrradh. Cha n-fhaca mise riamh a leithid. Cha chreid mi gu robh aona bhoirèannach fhéin ann. 'S ann aig an taigh a bha chosgais, 's cha robh ach duine no dithis ann aig an robh boinne a chòir na ghiùlaineadh e.

Cha robhas fada mu'n tiodhlacadh uile.

Phàidh mi £1 do Mhac R. Shaoir air son na lice a chuireadh aig ceann Mhic Iain 'ic Ruairidh. Chuala mi so durrghal bruidhne is mi ann am broinn Caibeal Fir Bhaghasdal. Cha d' rinn mi mach dé bha 'n duine 'g ràdh. Fhuair mi Eóghann is tharruinn sinn 's nuair a bha sinn sìos mu'n Abhainn Mhóir 's gu math mu dheas oirre, chluinneamaid éibh o am gu am as a' Chaibeal. Cha robh 'n ùpraid ud iomchuidh ann an leithid sud a dh' àite, 's gu seachd àraid dol a thòiseachadh air an leithid mun robh an uaigh cóig mionaidean air a dùnadh sìos. Chuala mi rithist gur ann mu dheidhinn an Dotair a bha 'n ùpraid uile.

Fhuair sinn sgoth air an Lùdaig, is ràinig sinn Carraig an Rodain beagan an deaghaidh dol fodha na gréine. Cha robh ach sianar a Eirisgeidh air an tòrradh 's bha sin cho math. Ghabh mi deagh-shuipeir an taigh a' chléirich—'s an fhiacail gu math sgaiteach.

Thug mi shùil air na pàipearan-naidheachd, 's ann a chunnaic mi mu bhàs Alasdair Thòisich a bha pòda aig piuthar mo mhàthar. Nach iongatach nach dug duine dhiubh fonear sgriobag a chur hugam m'a dheidhinn. Fois Dhé dha.

4mh Màrt (Di-h-Aoine).

Cha d' rinn mi bheag sam bith an diugh ach an latha chur seachad gu diomhain. Bha Cràbhadh Slighe na Croise againn feasgar, ach cha robh móran sam bith anns an Eaglais. Thadhail am Maighstir-Sgoil as deaghaidh na seirbheis, 's chuir e seachad greis dha'n oidhche ann an seanchas air iomadach ni.

Bha reothadh ann ann an am dhuinn a bhith dol a chadal.

5mh Màrt (Di-Sathuirne).

Bha dùil agam gur e reothadh a bhiodh againn an diugh ach 's ann a th'againn gaoth deas agus uisge. Tha mi 'n dòchas gun cuir i fuachd air fògradh. Cha robh againn ach sìde neimheil mhosach bho'n Fhéill Bhrìde, 's leis na shil i a shneachd cha n-urrainn nach bi deirèadh an earraich is toiseach an t-samhraidh na's blàithe na bha 'ad an uiridh.

Tha a' mhòine 'ga teireachdainn. Tha dhìol aig na bha mu làthrach na cruaiche cumail ris an taigh am màireach.